

Apeqquteqaat aallaavigalugu oqallisissatut siunnersuut, suliniutit suut suliniutigisinnaanerigut angajoqqaajunerup akisussaaffiullu pitsaanerulersinnissaanut aqutissiuussisinnaaneq angajoqqaat amerlanerit namminneq meeqqaminnut isumaginnissinnaanerisa qaffassarnissaannut taamaaliornikkullu angerlarsimaffiup avataanut inissiinerit ikilisarlugit

(Inatsisartunut ilaasortaq, Nivi Olsen, Demokraatit)

Akissuteqaat

(Meeqqanut, Inuusuttunut, Ilinniartitaanermit, Kultureqarnermit, Timersornermit Ilageeqarnermullu Naalakkersuisoq)

Siullermeerneqarnera

Inatsisartunut ilaasortaq Nivi Olsen (Demokraatit) inissiisarnerit ikilisinniarlugit angajoqqaajussuseq akisussaaffiullu pillugit pitsaanagerusumik siunnersuisarnissaq qulakkeerniarlugu sorlernik suliniuteqarnissaq pillugu pingaarutilittut oqaluuserisassatut siunnersuuteqarnera qutsavigaarput.

Ilaqutariinnik siusinnerpaamik sullissinikkut Naalakkersuisut atugarliorneq sumiginnaasarnerlu pinaveersaartinniarlugu suliaqarput. Suliaq tamanna iliuusissani suliniutinilu assigiinngitsorpassuarni takuneqarsinnaavoq.

Iliuusissatut pilersaarummi *Pitsaaliuineq pitsaanagerusoq, inissiinerit ikinnerusut* meeqqat toqqissisimanartumi angerlarsimaffimmi peroriartornissaat qulakkeerneqarnissaa siunertaavoq. Taamaaliortoqassappat ilaqutariit attaveqaataat isumalluutaallu pitsaaliuinermit atorineqartariaqarput, aamma kommunit pitsaaliuinermit eqqortumik iliuuseqartariaqarput.

Taamaattumik iliuusissatut pilersaarummi Namminersorlutik Oqartussat kommunillu akornanni suleqatigiinneq pingaarnertut tunngaviuvoq. Ilaqutariinnut ullumikkut pitsaaliuinermit suliniutit ilaat pioreersut, assersuutigalugu Siusissukkut Iliuuseqartarneq, Ilaqutariinnik siunersioqateqartarneq aamma MANU, kiisalu suliniutit iliuusissatut pilersaarutit periusissiallu aqutigalugit akuerineqarsimasut, soorlu ilaqutariinnik oqilisaassisartunik atuineruneq, persuttaasarneq pinaveersaartinniarlugu paasititsiniaanerit il.il. suleqatigiinnermit aallaavigineqassapput. Ilaqutariit siusissukkut iliuuseqarfigineqartarnissaat, najukkani isumalluutinik atuisarnissaq sapinngisamillu piffissami sivisuumi inissiisarnerit pinaveersaartinnissaat angerlartitsinissarlu siunertarineqassapput.

Isumaginninnermit Aqutsisoqarfiup suliniutaannut qitiusumik tunngaviit ilaagaat ilaqutariinnik tapersersuineq siunnersuinerlu kiisalu meeqqat angerlarsimaffiup avataanut inissinneqarnissaat pinngitsoortinniarlugu angajoqqaatut pisussaaffeqarnissaannik ikiuneq.

Angajoqqaatut pisussaaneq pillugu siunnersuineq ullumikkut ilaatigut suliniutinik ilaqarpoq: MANU, MANU+, Siusissukkut Iliuuseqartarneq, Meeqqanut ukioqanngitsuniit 18-inut ukiulinnut pilersaarutit aamma Ilaqutariit aqutissioqatigiinnerat.

Tamatuma saniatigut ilinniartinneqartarnerup ataavartumillu nalilersuisarnerup aaqqissorneqartarnerini suliaqarfiit assigiinngitsut suleqatigiinnerat tapersersorneqarpoq. Pilersaarusiormi ilaqutariinnilu aqutissioqatigiinnerup piviusunngortinneqarnissaanut piareersarnermi perorsaasuniit, ilinniartitsisuniit, ilaqutariinnut sullissivimmi sulisuniit,

sullissisuniit, MISI-mi sulisuniit il. il. suliamut isiginnittariaasaannik ilanngussinikkut meeqqat, inuusuttut taakkualu ilaquataat atugarliortut pisariaqartitaannik pitsaanerpaamik naapertuutsisisussamik tamakkiisumik isiginnittumik sullissinissaq qulakkeerneqassaaq.

Suliat suliarineqartarnerat oqilisarniarlugu suliassaqarfiillu assigiinngitsut suleqatigiinnerat nukittorsarniarlugu sulisuniit pisariaqartitat naapertorlugit Siusissukkut iliuuseqartarneq pillugu najoqqutassiamik Isumaginninnermut Aqutsisoqarfik aamma suliaqarsimavoq.

Taamatuttaaq angajoqqaat annerusumik suleqatigiittarnissaat sulissutigineqarsimavoq, tassani suli atualinngitsut pillugit siunnersortit ulluunerani neqeroorutini angajoqqaanik annerusumik suleqateqartarnissaq ukkatarimmassuk meeqqanillu atugarliorsinnaasunik siusissukkut paasisaqartarnissaq immikkut ukkatarimmassuk.

Siusissukkut iliuuseqassagutta pitsaanerusumik, taava pisariaqarpoq inatsisartut aningaasanut inatsisaanni - Inatsisartut aningaasaliissutinik immikkoortitsinissaat. Angajoqqaanut siunnersuineq, ilaqutariit avissaartinnagit aqqutissiuussineq, aamma kommunit sulisussaaleqinerannut iliuusissat aaqqiissutaasinnaasut suliarinissaannut Naalackersuisut pisinnaatitsissummik aningaasanillu pisariaqartitsipput.

Naalackersuisut aaliangiiffigisassatut siunnersuut siusissukkut iliuuseqarnissamut tunngasoq Inatsisartut Upernaakkut 2024-mut qaqqissimagaluarpaat. Aalajangiiffigisassatut siunnersuut ajoraluartumik Inatsisartut Siulittaasoqarfianniit akuerineqanngilaq.

Naggasiullugu meeqqanut ilaqutariinnullu sullissiviit, ilaqutariit illui qimarnguiillu pillugit nalunaarut nutaaq ulloq 1. februar 2024 atuutilerpoq. Meeqqanut ilaqutariinnullu sullissiviit kiisalu ilaqutariit illui meeqqanut, inuusuttunut ilaqutariinnullu, tassunga ilanngullugit ilaqutariinngulersut, meeqqat inuusuttullu inuttut atugarliortut imaluunniit immikkut ittunik pisariaqartitaqartut immikkut qitiutillugit suliaqarfiit assigiinngitsut akornatigut siunnersuisassasut, ilitsersuillutillu katsorsaasassasut nalunaarut aalajangersaavoq.

Naalackersuisuniit taamatut oqaaseqarluta una qulequtaq pingaarutilik pillugu pitsaasumik oqallittoqarnissaa qilanaaraarput.